

44 um hjallastæði, uppsetningu hjalla og um vafaatriði varðandi verkun og geymslu
12. marz skreiðar.

6. gr.

13. gr. orðist svo:

Skreiðarmatsstjóri skal sjá um að matsmenn séu ávallt til effirlits við pökkun og útskipun á skreið, að svo miklu leyti sem hann kemst ekki yfir það sjálfur. Farnrúm það, er skreiðin á að flytjast í, skal einnig athugað af skreiðarmatsstjóra eða matsmanni og það vera tryggt, að skreiðinni stafi engin hættu af vörum, sem þar eru, raka né öðru utan að komandi.

Reynist eitthvað athugavert, skal úr því bætt, ella skal stöðva útflutninginn.

Reglugerðarbreyting þessi er hér með sett samkvæmt lögum nr. 92 3. maí 1935, um meðferð, verkun og útflutning á sjávarafurðum, til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Atvinnu- og samgöngumálaráðuneytið, 12. marz 1946.

Áki Jakobsson.

Vigfús Einarsson.

45

11. marz

REGLUGERÐ

um vinnutíma starfsmanna ríkis og ríkisfyrirtækja.

1. gr.

Vikulegur vinnutími starfsfólks hjá ríki og ríkisstofnunum skal vera, sem hér segir:

I. Í skrifstofum, teiknistofum, við rannsóknarstörf, söfnin og önnur hliðstæð störf 35½ klst.

Daglegur starfstími skal vera frá kl. 9—12 og kl. 13—17, með ½ klst. kaffihlé eða frá kl. 13—16½ ef kaffihléi er sleppt. Á laugardögum er vinnutími aðeins til kl. 12. Afgreiðslu og viðtalstími skal ekki vera undir 4 klst á dag (2 klst. á laugardögum), yfirleitt á tímanum frá kl. 10—12 og kl. 13½—15½.

II. Við önnur innistörf en þau, sem talin eru undir I. tölulið, svo sem birgðavörzlu, verkstæðisvinnu, vöruafgreiðslu og framleiðslu hjá ríkiseinkasölu, skal vinnutíminn vera 45 klst. á viku.

Daglegur vinnutími skal vera á tímanum frá kl. 8—12 og frá kl. 13—18 alla virka daga, nema laugardaga frá kl. 8—12 með tveim 15 mínútna kaffihléum á staðnum, á laugardögum einar 15 mínútur.

III. Vinnutími loftskreytamanna og veðurfræðinga skal vera 36 klst. á viku.

IV. Vinnutími lögregluþjóna, tollvarða, verkstjóra við útivinnu, ráðsmanna, ráðskvenna og hjúkrunarkvenna skal vera 48 klst. á viku.

2. gr.

Vinnutími annarra starfsmanna skal vera hinn sami og verið hefur, þar til öðru vísi kann að verða ákveðið.

3. gr.

Þeir starfsmenn, sem vinna vaktir á sunnudögum eiga rétt á hvíldardegi í sömu viku til jafnlengdar og aukafrídaga skulu þeir, sem vinna í vöktum fá bættu með jafnmörgum orlofsdögum.

Þar sem vaktavinna er unnin skal helgidagavarðskrá samin fyrir eigi skemmri tíma en einn mánuð í senn og helgidagavinna skiptast sem jafnast niður á starfsmenn. 45 11. marz

4. gr.

Skylt er starfsmönnum að mæta stundvislega til starfa, hvort heldur að morgni eða eftir hlé og skulu skrifstofustjórar og aðrir yfirmenn starfanna fylgjast með því. Sérhver starfsmaður er skyldur til að vinna án endurgjalds eftirvinnu, er svarar að minnsta kosti til þess tíma er hann hefur vanrækt starfið og yfirvinna verður því aðeins greidd að hlutaðeigandi starfsmaður hafi áður skilað fullum vinnu-
stundafjölda á mánuði hverjum samkvæmt 1. gr. reglugerðar þessarar.

Nú sýnir starfsmaður ítrekaða óstundvisi og vanrækslu í starfi sínu og lætur ekki skipast við áminningar yfirmanna sinna og varðar það brottvikning úr starfinu um stundarsakir eða fyrir fullt og allt ef miklar sakir eru.

5. gr.

Ef óhjákvæmileg nauðsyn krefur skal starfsmönnum skylt að vinna eftirvinnu, gegn yfirvinnugreiðslu. Á yfirvinnu aðra en þá, sem um getur í 4. gr. skal greitt 50%—100% álag, sem ákveðið skal með hliðsjón af fastalaunum starfsmannsins, miðað við 1800 klst. árlegan vinnutíma.

Yfirvinnutaxtar skulu vera sem hér segir:

- a) Starfsmenn skv. XIII.—XV. launaflokkum. Yfirvinnukaup miðast við hámarksalaun XIV. flokks kr. 5400.00 á ári, kr. 3.00 á klst. auk álags og verðlagsuppbótar.
- b) Starfsmenn skv. X.—XII. launaflokkum. Yfirvinnukaup miðast við hámark XI. launaflokks kr. 7200.00 á ári, kr. 4.00 á klst. auk álags og verðlagsuppbótar.
- c) Starfsmenn VII.—IX. launaflokka. Yfirvinnukaupið miðast við hámark VIII. flokks kr. 9000.00 á ári, kr. 5.00 auk álags og verðlagsuppbótar.

Álag verður sem hér segir:

- I. Á eftirvinnu (allt að 4 klst. á dag)
 - A) — a-flokkur 50%.
 - B) — b- og c-flokkur 40%.
- II. Á nætur- og helgidagavinnu 100%.

Næturvinna telst frá kl. 21—8, en helgidagavinna frá kl. 17 á laugardögum.

Yfirvinna skal greidd í einu lagi eftir á fyrir hvern mánuð.

Heimilt er að vikja frá ofangreindum reglum um yfirvinnu og yfirvinnukaup, þegar sérstaklega stendur á og nauðsyn krefur og skal leita þar um tillagna BSRB.

6. gr.

Öll vafa- og ágreiningsatriði um framkvæmd reglugerðar þessarar skal leggja undir úrskurð nefndar þeirrar, sem skipuð er samkvæmt 37. gr. launalaganna.

7. gr.

Reglugerð þessi er sett samkvæmt lögum um laun starfsmanna ríkisins nr. 60 1945 og kemur til framkvæmda nú þegar.

Fjármálaráðuneytið, 11. marz 1946.

Pétur Magnússon.

Magnús Gíslason.